

ВО ВТОРНИК 5-Й СЕДМИЦЫ ПО ПАСХЕ

В ПОНЕДЕЛЬНИК ВЕЧЕРА,

На Господи воззвах: стихиры подобны, глас 1-й:

Подобен: Небесных чинов:

Творец всех и жизни Податель, Отцу Божественному соприисносущное Слово, волею от Девы плоть прием, и быв Человек, неизреченныя премудрости, яко Благ, всем источи учения.

Празднику преполовившуся иудейскому Христе, во святилищи предстал еси, закону Владыка уча властию, и книжники обличая, якоже писано есть, и ужасая премудростию словес Твоих, и чудес показаньми.

Податель премудрости, и добрых излиятель, изливаяй Божественныя струи, от источника приснотекущаго: приидите ко Мне, зовет, воду жизни жаждущии почерпите, и реки из чрева вашего, глаголет, дарований Божественных потекут.

Слава и ныне: глас 2-й:

Егда пришел еси во святилище Христе Боже, преполовившуся празднику, тогда люди учил еси, вопия: веруй в Мя, аще и умрет, жив будет. Иудей же распыхася с фарисей и саддукей и книжники, глаголюще: кто есть Сей, Иже глаголет хулы? не помышляюще, яко Ты еси прежде всех век, со Отцем и Духом славимый Боже наш, слава Тебе.

На стиховне стихиры Осмогласника, глас 4-й:

Древа преслушания запрещение разрешил еси Спасе, на Древе крестнем волею пригвоздився, и во ад сошед Сильне, смертныя узы яко Бог растерзал еси. Темже кланяемся еже из мертвых Твоему Воскресению, радостию вопиюще: всесильне Господи, слава Тебе.

Стих: К Тебе возведох очи мои:

Кто обуреваемый, и притекаяй ко пристанищу сему, не спасается? Или кто болезнуй, и припадаяй к врачевнице сей, не исцелевается? Соделателю всех, и врачу недугующих Господи, прежде даже до конца не погибну, спаси мя.

Стих: Помилуй нас Господи, помилуй нас:

Святых мученик приемый терпение, и от нас приими пение Человеколюбче, даруй нам тех молитвами велию милость.

Слава, и ныне: глас 3-й: Германа:

Преполовившуся празднику, славим посреде земли спасение Соделавша. Посреде убо двою разбойнику, Живот на Древе повешен бе, и хулящему убо умолчал, верующему же возопил: днесь со Мною будеши в рай. Сшел еси во гроб, пленил еси ад, и воскресл еси тридневно, спасая души наша.

По Ныне отпускаеши: и по Отче наш:

Тропарь празднику, глас 8-й:

Преполовившуся празнику, * жаждущую душу мою благочестия напой
водами, * яко всем, Спасе, возопил еси: * жаждай да грядет ко Мне и да пьет. *
Источниче жизни нашея, Христе Боже, слава Тебе.

[Слава: святого, аще имать. И ныне: празнику]

Ектенія, и отпуст.

ВО ВТОРНИК 5-Й СЕДМИЦЫ ПО ПАСХЕ

ВО ВТОРНИК НА УТРЕНИ.

По 1-м стихословии седален, глас 4-й:

Подобен: Удивися Иосиф:

Вольною Твоею волею Крест претерпел еси Спасе: и во гробе нове положиша Тя человецы смертнии, словом концы составльшаго. Темже связан бысть чуждий: смерть люто пленяшеса, и сущии во аде вси зываху живоносному востанию Твоему: Христос воскресе Жизнодавец, пребываяй во веки.

Стих: Господи, да не яростию Твоею обличиши мене, * ниже гневом Твоим накажеша мене.

Помышляй душе, како предстанем Судии? Поставятся престолы страшнии, и коегождо деяния обличатся. Тогда Судия неумолимый: тамо огонь люто предстанет, якоже свирепое море содержа, и покрываяй концы. Со всеми сими виждь душе моя, стени прежде конца.

Стих: Дивен Бог во святых Своих * Бог Израилев.

Мученичен: Иже во всем мире мученик Твоих, яко багряницею и виссом кровьми Церковь Твоя украсившися, теми вопиет Ти, Христе Боже: людем Твоим щедроты Твоя низпосли, мир жительству Твоему даруй, и душам нашим велию милость.

Слава, и ныне: Богородичен:

Страшное таинство, и чудо преславное, како Дева Тебе Зиждителя всех понесе, и по рождестве паки цела и Дева пребысть? Рождейся из Нея веру утверди, языки укроти, и мир умири, яко Человеколюбец.

По 2-м стихословии, седальны, глас 8-й:

Подобен: Премудрости слова:

Премудрости воду и жизни источая мирови, всех Спасе призываеши почерпсти спасения воды: Божественный бо закон Твой приим человек, в себе угашает, прелестное углие: отонудуже во веки не вжадет, ни престанет насыщения Твоего Владыко Царю Пренебесный. Сего ради славим державу Твою Христе Боже, прегрешений оставление просяще послати богато рабом Твоим.

Слава, и ныне: тойже

Воскресение Христово: псалом 50.

Канон праздника со ирмосы на 8, и Миней на 4. Кондак, и икос, и ексапостиларии праздника.

Песнь 1, глас 8-й

Ирмос: Море огустил еси, * погрузивый со оружием гордаго фараона, * и люди спасл еси немокренно Господи, * и ввел еси я в гору святыни, вопиющия: * поим Тебе Богу нашему песнь победную, яко прославися.

Языцы восплещите, евреи восплачите, животодавец бо Христос, узы адовы расторже, и мертвыя воскреси, и недуги исцели словом: Сей есть Бог наш, давый жизнь верующим во имя Его.

Чудо показал еси, воду в вино прешедшую, во Египте реки преложивый, Владыко, в кровь, и мертвыя воскресил еси, знамение сие второе скончав. Слава, Спасе, несказанному Твоему совету: слава истощанию Твоему, имже обновил еси нас.

Струя приснотекущая сый, Господи, жизни истинныя, Ты еси воскресение наше, хотя трудился еси, Спасе мой, и волею вжаждался еси, законом естества повинуюся, и в Сихарь шед плотину, воды просил еси у самаряныни пити.

Хлебы благословил еси, рыбы умножил еси, непостижимый Боже, и люди насытил еси независтно, и источник приснотекущий, премудрость, жаждущим обещал еси. Ты еси Спас Бог наш, давый живот верующим во имя Твое.

Троицен: Три собезначальны славлю и сопредстольны, Отца безначальна Бога, и Сына собезначальна, и Духа соприсносущна Сыну, едино триипостасное Существо, едино начало пребезначальное пою, безначальнаго Божества и Существа чту.

Богородичен: Едина вместила еси Зиждителя Твоего, Богородительнице, во чреве, и плотию родила еси неизреченно, и Дева пребыла еси, ничтоже девству осквернившуся. Сего, Чистая, яко Сына Твоего и Бога непрестанно моли о стаде Твоем присно.

И святаго Минея на 4.

Песнь 3.

Ирмос: Утвердися сердце мое во Господе, * вознесся рог мой в Бозе моем, * разширишася на враги моя уста моя, * возвеселихся о спасении Твоем.

Не иже на лице суд судите, иудее, уча глаголаше Владыка, егда прииде во святилище, якоже писано есть, преполовившуся законному празднику.

Не иже на лице суд судите, иудее: Христос бо прииде, Егоже нарицаху пророцы от Сиона грядуща и мир взывающа.

Аще и словесем не веруете, иудее, делом веруйте Владыки: что прельщаетесь, отметающеся Святаго, Егоже написа в законе Моисей?

Аще мессии всяко подобает приити, иудее, Христос же прииде ныне Мессиа: что прельщаетесь, отметающеся Праведнаго, Егоже написа в законе Моисей?

Троицен: Тебе покланяемся, Отче, безначальный Существом, поем безначального Сына Твоего, и Духа благочестно Всесвятаго, яко единого три, естеством Бога.

Богородичен: Един от Троицы сый быв, плоть виделся еси, не преложь, Господи, существа, ниже опалив Рождшия нетленное чрево, Бог сый весь и огонь.

И святаго Минея на 4.

Кондак, Икос, и Седален святаго. Таже:

Слава, и ныне. Седален, глас 8-й.

Соя посреди светилища, * преполовляющуся божествене празднику, * жаждай взываше, да грядет ко Мне и пьет, * пияи бо от сея Божественныя Моея воды, * реки из чрева источит повелении Моих. * Яко иже верует в Мя, посланнаго от Божественаго Родителя, * со Мною прославится. * Сего ради вопием Ти, * слава Тебе Христе Боже, * яко богато излиал еси воды Твоего человеколюбия рабом Своим.

Песнь 4.

Ирмос: Пророк Аввакум умными очима * провиде, Господи, пришествие Твое, * тем и вопияше: от юга придет Бог. * Слава силе Твоей, слава низхождению Твоему.

Аще мессии подобает прийти, Мессиа же Христос есть, беззаконнии, что не веруете Ему? Се прииде, и свидетельствует, яже Той творит: воду вино сотвори, расслабленного словом стягну.

Не разумеюще писаний, прельщаетесь вси вы, евреи беззаконнии: воистинну бо прииде Христос, и всех просвети, и в вас показа многая знамения и чудеса, и все отрицаетесь истиннаго живота

Едино дело показав вам, и вси уже дивитесь, взываше иудеем Христос. Вы обрезуете и в субботу человека, рече, Мене же что оклеветаете прочее, воздвигшаго словом расслабленного?

Дела сотворих многая, и коего ради дела камением бьете Мя? Иудеем Христос, обличая, взываше: еда зане человека здрава всего словом сотворих, не судите на лице человецы.

Троицен: Троице нераздельная Единице, безначальне Отче, Сыне и Душе Святой, во Единице Троица равночестная, сопрестольная, животворящая, несозданный Боже, спасай воспевающия Тя, и избави от бед и скорбей.

Богородичен: Во чреве Твоем Бога неописанно вместившая, Богоневесто, Дево Мати Чистая, не престай молящи о нас, яко да Тобою избавимся от обстояний, к Тебе бо присно прибегаем.

И святаго Минея на 4.

Песнь 5.

Ирмос: Господи Боже наш * мир даждь нам, * Господи Боже наш, стяжи ны, * Господи, разве Тебе иного не вемы, * Имя Твое именуем.

Чудесы украсил еси апостолы Твоя, дивесы возвеличил еси ученики, во всем мире прославил, Спасе наш, и дав им Царствие Твое.

Вся просветиша земли концы ученицы, чудесы и ученьми, и различными образы слово проповедавшие, Христе Спасе, Царствия Твоего.

Хвалу возсылаем Царствию Твоему, пение же Тебе приносим, нас ради на земли явившемуся, и мир просветившему, и Адама воззвавшему.

Троицен: Слава Тебе, Отче Святыи, Боже нерожденне: слава Тебе, Слове безлетне единородне: слава Тебе, Душе Божественне и сопрестольне, и единосущне Отцу и Сыну.

Богородичен: Бысть чрево Твое святая трапеза, имущая небесный хлеб, от негоже всяк ядый не умирает, якоже рече всех, Богородительнице, Питатель.

И святого Минея на 4.

Песнь 6.

Ирмос: Яко воды морския, Человеколюбче, * волнами житейскими обуреваюся, * темже, яко Иона, тако вопию Ти: * возведи от тли живот мой, * Благоутробне Господи.

Вся содержай концы, возшел еси, Иисусе, и учил еси во святилици народы слову истины, празднику преполовляющуся, якоже Иоанн вопиет.

Отверзл еси устне Твои, Владыко, проповедал еси мируи безлетнаго Отца, и Всесвятаго Духа, сродное обоих храня и по воплощении.

Дело Отчее совершил еси, дела уверил еси словеса Твоя, исцеления совершая Спасе, и знамения, расслабленнаго исправляя, прокаженныя очищая, и мертвыя воскрешая.

Безначальный Сын начало бысть прием, еже по нам вочеловечися, и посреде праздника учаше, глаголя: притецйте ко источнику приснотекущему, жизнь почерпите.

Троицен: Едино в Троице Божество, Существо триипостасное, несозданное, нераздельное вси славим, Отца, и Сына, и Святаго Духа, яко три сущее, и едино.

Богородичен: Деву по рождестве поем Тя, Деву и Матерь славим Тебе единому, Чистая Богоневесто Отроковице, из Тебе бо воистинну Бог воплотися, обновив нас.

И святого Минея на 4.

Кондак, глас 4-й.

Празднику законному преполовившуся, * всяческих Творец и Владыка, * к предстоящим глаголаше Христе Боже: * приидите и почерпите воду бессмертия. * Тем же Ти припадаем и верно вопием, * щедроты Твоя даруй нам. * Ты бо еси источник животу нашему.

Икос. Олядевшую ми душу согрешенми и беззаконии, кроплеными Твоих кровей напой, и покажи плодоносну добродетельми. Ты бо рече всем приходящим к Тебе, слово Божие пречистое, воду нетления почерпите, живу же и очищающую грехи, поющим славное и божественное Твое востание, подавая Благии иже с высоты сопедшую воистину учеником Твоим Духа крепость, Тебе Бога ведящим, Ты бо еси источник животу нашему.

Песнь 7.

Ирмос: Халдейская пещь, огнем распалаемая, * орошашеся Духом, * Божиим предстоянием, * отроцы пояху: * благословен еси, Боже отец наших.

Плотски потрудился еси, упокоение всех: волею вжаждался еси, источнике чудес: воды просил еси, воду жизни, Иисусе, возвещай.

Самаряныни, Господи, жене беседовал еси, обличая безумие беззаконных евреев: она убо верова Сына быти Божия, сии же отвергошася.

Воду живую истекающую, воду бессмертия, источник присноживущий подати обещал еси, верую Дух Твой приемлющим, Спасе, от Отца происходящий.

Пятьми хлебы препитал еси, тысячи алчущих, и насыщения останки, в другия тысячи, Спасе умножил еси, показуя славу Твою священным учеником.

Троицен: Поклоняемся Твоему, Господи, Пречистому Отцу, и благодати Духа, юже Твоим апостолом Бог сый раздал еси, посылая их на проповедь.

Богородичен: Во чреве Твоем вместила еси невместимаго Слова, от Твоих сосец доила еси миру Питателя, на объятии носила еси Содержителя нашего, Богородительнице Чистая.

И святого Минея на 4.

Песнь 8.

Ирмос: Ангели и небеса, * на престоле славы сидящаго * и яко Бога непрестанно славимаго, * благословите, пойте * и превозносите Его во веки.

Приидите видите, людие, на престоле славы воспеваемого, от людей беззаконных хулимаго, и видяще пойте в пророцех Мессию предреченнаго.

Ты еси воистинну Христос, в мир сей пришедый, из Негоже спасение и оставление отеческих согрешений: Ты еси воистинну живот, в Тя веровавшим.

Премудрость Божия, преполовившуся празднику, якоже писано есть, во святилищи предста и учаще, яко воистинну Сей бяше Мессиа Христос, Имже спасение.

В субботах Христос, и по вся дни показоваше знамений дела, исцеляя сущия в недужех различных: но прельщеннии людие яростию распыхахуся.

Троицен: Един Бог убо Троица, Отцу не преступившу в сыновство, ниже Сыну предложуся во исхождение: но свойтвенная и обоя, Свет Бога, три прославляю во век.

Богородичен: Како родила еси, рцы, от Отца безлетно просиявшаго, и со Святым Духом воспеваемого? Или яко весть един благоволивый из Тебе родитися, Богородице.

И святаго Минея на 4.

Песнь 9.

Ирмос: Чужде матерем девство, * и странно девам деторождение: * на Тебе Богородице, обоя устроишася. * Тем Тя вся племена земная * непрестанно величаем.

Празднику преполовляющуся иудейскому, возшел еси, Спасе мой, во святилище Твое, и научал еси всех: чудяхуся же иудее, и откуда Сей весть письменна не научився, глаголаху.

Исцеления дарований Избавитель мой источая, сотворяше чудеса и знамения, прогоня недуги, целя немощствующия: но иудеи неистовствовахуся множеством чудес Его.

Непокоривыя иудеи Избавитель мой обличая, вопияше: не судите на лице, но праведен суд судите: ибо закон и в субботу обрезоватися повелевает всякому человеку.

Большая чудес учеником Твоим, Спасе, якоже обещав, подал еси, послав в языки проповедати славу Твою: они же мирови проповедаху Твое Воскресение, благодать и воплощение.

Троицен: Чужде есть беззаконным славити безначальную Троицу, Отца, и Сына же, и Святаго Духа, несозданное вседержание, Имже весь мир создася державою крепости Ея.

Богородичен: Вместила еси во чреве Твоем, Дево Мати, единого от Троицы Христа Жизнодавца, Егоже поет вся тварь, и трепещут горнии престолы: Того моли, Всеблаженная, спасти души наша.

И святаго Минея на 4.

Катавасия: Светися, светися ...,

Светилен.

Подобен: Небо звездами:

Жаждай вzywаше, да грядет ко Мне и пьет, * пияи бо от сея Божественныя Моя вода, * реки из чрева источит повелении Моих. * Сего ради вопием Ти, * слава Тебе Христе Боже, * яко богато изливал еси воды Твоего человеколюбия рабом Своим. [Дважды.]

Слава, и ныне: тойже

На хвалитех поставим стихи 4. И поем стихиры Осмогласника. Глас 4-й:

Крестом Твоим Христе, от древняя клятвы свободил еси нас, и смертию Твоею естество наше мучащаго диавола упразднил еси: востанием же Твоим радости вся исполнил еси. Темже вопием Ти: воскресый из мертвых Господи, слава Тебе. [Дважды.]

Омый мя слезами моими Спасе, яко оскверних во многих гресех. Темже и припадаю Ти Милостиве: согреших, помилуй мя Боже.

Мученичен: Ангелом сопричастницы бысте святии мученицы, в подвизе Христа мужески проповедавшие: вся бо яже в мире остависте красная, яко не сущая, веру же яко анкиру твердую удержасте. Темже и леств отгнавшие, источаете верным исцелений дарования, непрестанно молящися спастися душам нашим.

Слава, и ныне: глас 4-й:

Господи, прежде честнаго Твоего Креста, празднику преполовившуся, во святилище вшел еси, иудеи со дерзновением уча, Моисеем и в законе Тобою законоположенным, ужасающагося же Христе Твоя премудрости неизреченному таинству, еже на Тя роптанию в себе завистию поучахуся: како Сей весть писмена не учився? Не ведяще Тебе Спаса душ наших.

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры подобны, глас 2-й:

Подобен: Доме Евфрафов:

Конец сый и начало, * преполовление же, * посреде праздника * предстал еси во святилищи Христе мой, * источая ми оставление.

Стих: Помяни сонм Твой, егоже стяжал еси исперва.

Слыша Сион * Воскресения Твоего * Божественную державу Слове, * и радуется с чады, воспевая Тя * Благоутробнаго.

Стих: Бог же Царь наш прежде века:

Свет от Отца, возсияв Слово, * напоследи лет * явился еси * яко Человек, подая мне * прегрешений оставление.

Слава, и ныне: глас 8-й:

Преполовившуся празднику Пасхи, в храм вшел еси святилищный Спасе наш, и став посреде народа, учил еси тех с дерзновением, и глагола еси: Аз есмь свет мира, в след Мене идыи не имать ходити во тме, но имети будет свет бессмертныя жизни.

Таже, Благо есть исповедатися Господеви

Трисвятое. И по Отче наш:

Тропарь празднику, глас 8-й:

Преполовившуся празнику, * жаждущую душу мою благочестия напой
водами, * яко всем, Спасе, возопил еси: * жагдай да грядет ко Мне и да пьет. *
Источниче жизни нашея, Христе Боже, слава Тебе.

Таже ектенія: Помилуй нас Боже:

Час 1. И отпуст.

ВО ВТОРНИК 5-Й СЕДМИЦЫ ПО ПАСХЕ НА ЛИТУРГИИ

Блаженна от канона праздника, Песнь 8-й, 8-го гласа, на 6:

Приидите видите, людие, на престоле славы воспеваемого, от людей беззаконных хулимаго, и видяще пойте в пророцех Мессию предреченнаго.

Ты еси воистинну Христос, в мир сей пришедый, из Негоже спасение и оставление отеческих согрешений: Ты еси воистинну живот, в Тя веровавшим.

Премудрость Божия, преполовившуся празднику, якоже писано есть, во святилици предста и учаше, яко воистинну Сей бяше Мессиа Христос, Имже спасение.

В субботах Христос, и по вся дни показоваше знамений дела, исцеляя сущия в недужех различных: но прельщеннии людие яростию распыхахуся.

Слава, Троичен: Един Бог убо Троица, Отцу не преступившу в сыновство, ниже Сыну преложишуся во исхождение: но свойтвенная и обоя, Свет Бога, три прославляю во век.

И ныне: Богородичен: Како родила еси, рцы, от Отца безлетно просияваго, и со Святым Духом воспеваемого? Или яко весть един благоволивый из Тебе родитися, Богородице.

По входе Тропарь празднику, глас 8-й:

Преполовившуся празднику, * жаждущую душу мою благочестия напои водами, * яко всем, Спасе, возопил еси: * жагдай да грядет ко Мне и да пьет. * Источниче жизни нашея, Христе Боже, слава Тебе.

И храма Богородицы, и храма святаго. Посем настоящего святаго, аще есть. Таже кондак храма святаго.

Слава, кондак самаряныни, глас 8-й:

Верою пришедшая на кладязь самаряныня, виде Тя премудрости воду, еюже напоившись обильно, царствие Вышее наследова вечно, яко приснославная.

И ныне: праздника: Кондак, глас 4-й:

Празднику законному преполовившуся, * всяческих Творец и Владыка, * к предстоящим глаголаше Христе Боже: * приидите и почерпите воду бессмертия. * Тем же Ти припадаем и верно вопием, * щедроты Твоя даруй нам. * Ты бо еси источник животу нашему.

Прокимен апостола, глас 3-й:

Велий Господь наш, и велия крепость Его, * и разума Его несть числа.

Стих: Хвалите Господа яко благ псалом: Богови нашему да усладится хваление.

Апостол Деяний, зачало 31. [Деян. 12, 25–13, 12.]

Во дни оны, Варнава и Савл, возвратистася из Иерусалима во Антиохию, исполнивши службу, поемши с собою и Иоанна, нарицаемого Марка. Бяху же нещии во церкви сущей во Антиохии, пророцы и учителя, Варнава же и Симеон нарицаемый Нигер, и Лукий Киринеанин, и Манаин со Иродом четвертовластником воспитанный, и Савл. Служащим же им Господеви, и постящимся, рече Дух Святыи: отделите Ми Варнаву и Савла на дело, на неже призвах их. Тогда постившеся, и помолившеся, и возложше руки на ня, отпустиша их. Сия убо послана бывша от Духа Свята, снисходя в Селевкию, оттуда же отплыша в Кипр. И бывше в Саламине, возвещаста слово Божие в сонмищах иудейских: иместа же и Иоанна слугу. Прощедша же остров даже до Пафа, обретоста некоего мужа волхва лжепророка иудеанина, емуже имя Вариисус: иже бе со анфипатом Сергием Павлом, мужем разумным. Сей призвав Варнаву и Савла, взыска услышати слово Божие. Сопротивляшеся же има Елима волхв, [так о бо сказуется имя его,] иский развратити анфипата от веры. Савл же, иже и Павел, исполнися Духа Свята, и воззрев на нь, рече: о, исполненне всякия лести и всякия злобы, сыне диаволь, враже всякия правды, не престанеши ли развращая пути Господни правыи? И ныне се рука Господня на тя, и будещи слеп, не видя солнца до времени. Внезапу же нападе на нь мрак и тма, и осязая искаше вожда. Тогда виде анфипат бывшее, верова, дився о учении Господни.

Аллилуиа глас 1-й: Помяни сонм Твой, егоже стяжал еси исперва.

Стих: Бог же Царь наш прежде века, содела спасение посреде земли.

Евангелие Иоанна, зачало 33. [Ин. 8, 51–59.]

Рече Господь ко пришедшим к Нему иудеем: аминь, аминь глаголю вам: аще кто слово Мое соблюдет, смерти не имать видети во веки. Реша убо Ему жидове: ныне разумехом, яко беса имаши. Авраам умре и пророцы, и Ты глаголеши: аще кто слово Мое соблюдет, смерти не имать вкусити во веки: Еда Ты болий еси отца нашего Авраама, иже умре? и пророцы умроша: кого Ся Сам Ты твориши? Отвеща Иисус: аще Аз славлюся Сам, слава Моя ничесоже есть: есть Отец Мой славий Мя, Егоже вы глаголете, яко Бог ваш есть. И не познасте Его, Аз же вем Его: и аще реку, яко не вем Его, буду подобен вам ложь: но вем Его, и слово Его соблюдаю. Авраам отец ваш рад бы был, да бы видел день Мой: и виде, и возрадовася. Реша же иудее к Нему: пятидесят лет не у имаши, и Авраама ли еси видел? Рече же им Иисус: аминь, аминь глаголю вам: прежде даже Авраам не бысть, Аз есмь. Взяхша же камение, да вергут Нань: Иисус же скрыся, и изыде из церкви, прошед посреде их: и мимоходаше тако.

Вместо Достойно: прмос, глас 8-й:

Ирмос: Чужде матерем девство, * и странно девам деторождение: * на Тебе Богородице, обоя устроишася. * Тем Тя вся племена земная * непрестанно величаем.

Причастен: Ядый Мою Плоть, и пияй Мою Кровь, во Мне пребывает, и Аз в нем, рече Господь. Аллилуиа, [трижды.]